

SCRIPT OF MORNING GOJRI NEWS BULLETIN 28APRIL 2025 1015HRS

مارننگ گو جری نیوز بلیٹن مورخہ 28 اپریل 2025

یوہ آکا شوانی جموں ہے محبوب سلطان تیں خبر سُنو۔

JKLA SPECIAL SESSION

جموں کشمیر مانہ کابینہ کی درخواست ور لیفٹیننٹ گورنر منوج سنہا نے اج جموں کشمیر قانون ساز اسمبلی گو خصوصی اجلاس بلايو ہے تانجے پہلگام دہشت گردانہ حملہ ور گل بات کی جاسکے۔ واضع رہ جے اس دہشت گردانہ حملہ مانہ ۵۲ سیلانی تے اک مقامی شخص فوت ہو گيو تھو اس ضمن مانہ اج اسمبلی اندر اس حملہ مانہ فوت ہون آلا نانہ خراج عقیدت پیش کیو جے غو جس توں بعد اس واقعہ تے اس سنگ جڑیا واں دوجا معاملہ ور گل بات کی جے گی تے نال ہی نال ایک قرار دار منظور کرگے اس افسوس ناک واقعہ کی سخت الفاظ مانہ مزمت کی جے گی۔

CM TERRORISM

پہلگام دہشت گردانہ حملہ توں بعد وزیر اعلیٰ عمر عبداللہ نے دہشت گردی تے اس سنگ جڑیا واں غے خلاف سخت کاروائی کرن بارے کیو ہے انہاں نے کشمیری عوام کی طرفوں کھل گے دہشت گردی کی مخالف کرن تے معصوم افراد گا قتل کی مزمت کرن بارے سراہنا کی اک سماجی میڈیا پوسٹ مانہ جناب عمر عبداللہ نے اس حملہ مانہ شامل افراد غے خلاف فوری تے سخت کاروائی گو مطالبو کرتا مانہ کیو جے اُن گے سنگ کوئی رحم نہیں برتیو جانو چاہیے۔ انہاں نے اس بارے خبردار کرتا مانہ کیو جے ایسی کوئی وی غلطی نہیں ہونی چاہیے جہیڑی لوکاں نانہ دور کرشوڑے تے اُن نے اس گل ور زور پاتا مانہ کہیو جے دہشت گردی گے خلاف جاری جنگ مانہ معصوم جاناں گا تحفظ نانہ یقینی بنایو جے۔

MOS UDHAMPUR SECURITY

مرکزی وزیر مملکت ڈاکٹر جتندر سنگھ نے پچھلے تہاڑے ادھمپور مانہ اک اعلیٰ سطحی حفاظتی جائیزہ میٹنگ کی صدارت کرگے دہشت گردی غے خلاف بلکل وی برداشت نانہ کرن کی پالیسی نانہ دہرایو ہے اس میٹنگ مانہ حفاظتی تے انتظامیہ گا سنئیر حکام وی موجود تھا جنہاں نے ادھمپور، کٹھوعہ رینج مانہ دہشت گردی غے خلاف سخت کاروائیاں بارے جانکاری دتی اس دوران باندے آن آلا خطران گو جلد تے مضبوط جواب دین ور زور پایو گيو جڑو وزیر اعظم نریندر مودی کی بلکل وی برداشت نانہ کرن کی پالیسی سنگ جڑیو وہ ہے۔ اس تیں علاوہ عوامی نمائینداں تے سول سوسائٹی گا ممبران سنگ اک میٹنگ منعقد کرگے حفاظتی مسائل ور گل بات کی کئی یا میٹنگ پہلگام دہشت گردانہ حملہ مانہ متاثرین نانہ خراج عقیدت پیش کرن واسطے ۲ منٹ کی خاموشی توں شروع ہوئی جہیڑی دہشت گردی غے خلاف اتحاد تے اک جٹ عزم کی عکاسی کرے۔

RAJNATH CDS MEET

وزیر دفاع راج ناتھ سنگھ نے پچھلے تہاڑے دفاعی عملا گا سربراہ جنرل انیل چوہان سنگ ملاقات کرگے پہلگام دہشت گرد حملہ گا جواب مانہ فجعی تیاریاں توں متعلق اہم معاملہ ور گل

بات کی ہے واضع رہ جے ملاقات نوی دہلی مانہ وزیر دفاع گی رہائش گاہ و ہوئی جہیڑی تقریباً ۰۴ منٹ توڑی جاری رہی ذرائع غے مطابق جنرل چوہان نے وزیر دفاع نانہ دہشت گردی گا خاتمہ واسطے فوجی حکمت عملی تے تیاریاں بارے جانکاری دتی۔

BUDGAM OGW

ضلع بڈگام مانہ پولیس نے دہشت گرد تنظیمان نانہ بار توں مدد کرن آلا ۲ او جی ڈبلیو نانہ عوامی تحفظ گا قانون غے تحت حراست مانہ لے ليو ہے جن گی پشان طاہر احمدکمار جہیڑو پکھیرا پورا گو رہن آلو جدکہ شبیر احمد گنئی جہیڑو کارپورہ گو بسنیک ہے گا طور ور کی گئی ہے دہشت گردی تے ملک دشمن گردانان سرگرمیاں مانہ شامل تھا جن مانہ دہشت گردان گی نقل وحرکت جگہ دینی تے دیگر مدد شامل ہے حکام نے اس گل گی تصدیق کرتا مانہ کیو ہے جے پی ایس اے گے تحت ان گی حراست گو مقصد ان گی سرگرمیاں ور روک لانو تے دہشت گردی گے مدد کرن آلا گا نیٹ ورک نانہ توڑنو ہے۔

DODA TOURIST

پہلگام دہشت گردانان حملہ تون کُجھ تہاڑے بعد ڈر نانہ ہراتا مانہ تے حوصلہ غو مظاہرو کرتا مانہ پورا ملک تون سینکڑاں گی تعداد مانہ سیلانی ڈوڈہ ضلع گا گنڈالا تے چہترگالا گو رُخ کر رہیا ہیں تانجے برف تون ٹکیاواں میدانان گو لطف ليو جاسکے سیلانیان گی پر جوش موجودگی نے دہشت گردی غے خلاف اک مضبوط پیغام دتو ہے تے اتحاد تے بہادری گا جذبہ نانہ اُجاگر کیو ہے اس سلسلہ مانہ حکام نے کہی وجے تمام حفاظتی قدم چایا گیا ہیں جن مانہ اضافی نفری گی تعیناتی وی شامل ہے تانجے سیلانیان گی حفاظت نانہ یقینی بنایو جاسکے۔

RAMBAN SERICULTURE

ریشم گی صنعت نانہ مضبوط بنان تے گرایاں گی معشیت نانہ بہتر بنان گی کوشش گا طور ور رام بن مانہ ریشم غا محکمان گی طرفوں بیداری کیمپاں گو انعقاد کیو جارہیو ہے تانجے ریشمگی کاشت نانہ فروغ دیتو جاسکے، ان کیمپاں گے اندر کسانان نانہ جدید ریشمی تکنیکاں بارے جانکاری فراہم کرن تے بکھ بکھ سرکاری سکیمان بارے وی آگاہ کیو جارہیو ہے۔ ریشم گی پیداوار تے معشیت نانہ بدھان واسطے بکھ بکھ پہل کی گئی جن مانہ سلک سمگر ہ تے دیگر شامل ہیں۔

HIGHWAY

جموں سرینگر قومی شاہراہ ور حکام نے جموں تون سرینگر واسطے اک طرفاں گڈیاں گی آؤجائی گی اجازت دے دتی ہے اس ضمنمانہ دسیو گیو ہے جے لوہکی گڈیاں نانہ اج سویرے ۸ بجے تون بعد نگرولہ تون نقل حرکت گی اجازت دے دتی گئی ہے جدکہ بڑی گڈیاں نانہ جکھینی ادھمپور تون شام ۷ بجے تون بعد جان گی اجازت دتی جے گی۔
